

四庫全書

集部

欽定四庫全書

碧梧玩芳集卷五

宋 馬廷鸞 撰

制

顯謨閣待制兩浙路轉運趙與言特授尚書戶

部侍郎兼知臨安府制

唐戶部之用李回取其治辦漢京兆之命劉德多所平  
反嗟古人各擅於一長匪宗雋孰兼於二任具官某材  
猷膚敏智畧通明象賢為秀邸之英大雅軼河間之譽

豈無他人不如同姓見謂親賢用於昔日稱之曰能簡  
知先帝治常賦者民部建首善者京師命以真除皆其  
素歷朕式敷德惠善繼先猷以庶邦惟正之供悉却奉  
宸之獻則百姓孰與不足冀寬天下之民非屬宗英疇  
知予意噫嗣王求助莫先論思獻納之聯宗子維城首  
課蕃宣屏翰之續欽承明訓益勵嘉庸可

觀文殿學士提舉臨安府洞霄宮馬光祖依前  
職特授沿江制置大使兼知建康府兼江東安

撫大使兼行宮留守制

朕簡求近弼重鎮陪京念昔全江淮以濟中興允資碩  
望矧今崇詩書而謀元帥詎舍舊人起之燕閒付以居  
守爰疏茂渥申錫贊書具官某器偉量閎資凝猷遠炳  
著龜之先見凜松柏之後凋方叔元老克壯其猷歷蕃  
宣於四國君陳嘉謀入告爾后嘗唯諾於一堂頃以蓋  
臣荐分江閩投鞭欲渡有颶回霧塞之顯憂杖鉞以先  
助霆擊電掃之勝勢威名猶在義槩可嘉朕慨念留都

控扼天塹雖千羣奚用已屹立金湯之形然一物不牢  
敢少怠衣衾之戒孰寬憂顧無若老成兵將素服其撫  
循民吏夙安其條教龍蟠虎踞山川不易於鎮臨魚鱗  
麟符麾幟一新於號令以壯外攘敵人之畧以恢北定  
中原之規噫朴以清脩固再臨於益部琦以勛輔尚三  
典於相臺勉企前脩益光賢業可

朝請大夫試兵部侍郎兩淮制置使兼知揚州  
李庭芝除寶章閣直學士依舊任制

元帥崇詩書久幹方而佐辟學士備顧問爰進律以褒  
功迪惟英儒允稱茂渥具官某經綸學富綏御謀長材  
能空冀北之良人物挺漢東之秀正封從軍之句蚤欲  
驅海若而逐天狼德裕籌邊之圖可以扼吐蕃而控南  
詔五年制閩兩道撫師齊人章章而歸魯疆申伯疊疊  
而維周翰率彼淮浦賢於長城春爾條桑秋爾滌場坐  
喜邊民之復業文能附衆武能威敵疇非帥閫之成勞  
伊功伐之可稱屬倚毗之方厚登華邃閣增重禁塗仍

資固圉之謀嗣奮折衝之畧噫寧人有拓疆土永言寶  
宇之儲賢者能立邦家在固金甌之業式寬憂顧益懋  
綏懷可

兩淮安撫制置使兼知揚州李庭芝特授寶章  
閣學士依舊任制

朕祇膺遺訓嗣守丕圖見堯於牆敢忘繼承之志維周  
之翰肆酬藩屏之庸嘉乃殊勞畀予新渥具官某忠忱  
一節文武兼資被遇先皇久臨制閫王師截淮浦所期

徐土之清諸將收山東坐使齊疆之復狼烽灰冷木柝  
聲沈我陵我阿有藝祖興王之境實庸實壑拓中興用  
武之區越自紹統之初式倚幹方之績茲崇褒律以起  
駿功煥乎文章固已陟穹班於寶度戒我師旅其惟固  
全業於金甌可

汪立信除秘閣修撰樞密副都承旨依舊沿江  
制置副使江西安撫使制

長江為天限久分塹於中流北斗幹神樞俾親承於密



旨嘉乃幹方之烈昭予進律之恩必也正名為之申命  
具官某賦資平實受材恢宏九流之學圓機千人之英  
脫穎有慷慨大志匪章句儒以文武威風當方面寄睠  
言外屏允藉通材鎮臨莫重於潯陽備禦遠周於淮浦  
中權後勁輯萬竈之雲屯上遡下沿撫千艘之水擊豈  
投鞭之可逞縱呼檄以不來爰獎茂庸肆頒殊渥峻道  
山之論撰贊宥府之訏謨兼正使名增崇閭制吁爾不  
可厭也所宜謹護於風寒吾有以待之靡俟綢繆於陰

雨欽予辰告賴爾秋防可

汪立信除集英殿修撰依舊樞密副都承旨沿  
江制置副使知江州江西安撫使制

朕祇膺遺訓嗣守丕圖見堯於牆敢怠繼承之志維周  
之翰肆酬藩屏之庸嘉乃殊勞畀予新渥爾忠忱一節  
文武兼資被遇先皇久臨江閩勢連全楚控荆鄂之上  
流境接長淮固蘄黃之外屏塞烽息警邊柝沈聲粵惟  
紹統之初實倚幹方之績茲崇褒律以起駿功十三等

殿閣之班官分冷熱數千里江防之寄職護風寒勉建  
嘉猷答揚休命可

集英殿修撰江東運副兼淮西總領陸景思特  
授權戶部侍郎淮東總領制

朕嘉與儒臣精求國計周官以小司徒掌教惟人民土  
地之稽本朝以四總領供軍有錢穀甲兵之問孰膺隆  
委允屬通材具官某學該體用之源家擅文章之錄夙  
繇駿望早上通塗四禁代言允茲潤色十連為帥式倚

蕃宣察其器能政理之長不在語言文字之末雖精筆  
妙墨揚雄最其善鳴然畫筭算邊劉晏本於道御既勤  
轉漕併總賦輿惟六官服采而版部最勞四鄙宿兵而  
大農益耗量入為出計臣所以阜邦財自西徂東王人  
均於領餉事其升從橐仍駕使輶諒無乏興庶幾宿飽  
噫振甘泉之珮既高獻納之邇聯濟京口之航宜贊誓  
清之遠畧可

陳宗禮除直龍圖閣淮西轉運使制

朕解瑟而更招弓四出卷阿言求士每懷朝陽高岡之  
鳴宣室不見生未奉夜半前席之問特峻淵圖之直俾  
華冰漕之行爾行已無磷緇立朝有本末榮進素定固  
知要路之在前介特自持詎忍撓節而速化悼邪朋之  
欺蔽嘉正論之指陳起之山林畀以原隰中遭煩嘖久  
已照知念爾滯留再膺臨遣噫轉關中之漕莫如淮浦  
之事優督渭上之耕宜使邊庭之畧足勉將明指豈汝  
遐遺可

中大夫吳堅特授華文閣待制福建路計度轉運使制

朕治本愛民仁宜舉遠矐七閩之奧壤孰任澄清咨兩禁之近臣式勤諏度起之家食送以皇華具官某博識通材清文膽學從塗筆索先朝峻列於嚴徐儲宋衣冠東禁嘗叅於黃綺王乃初服爾惟舊人茲振迹於丘園俾馳聲於原隰既輸爾載靡彈晉監之藏用告乃猷仍俟漢松之對倘宣使指斯究民瘼刺史問事有六條允

資按察建州去京八千里尚克將明務綏遠民以稱茂簡可

史繩祖陞直煥章閣江東提舉制

朕詢求民隱臨遣儒英乃積乃倉無復西江之轍涸爰  
咨爰度尚虞東國之杼空以爾人有典刑學探淵緼緒  
十二經以說仰屋著書以六百石之官乘軺刺部重  
申命自西徂東煥乎有文章仍直寶儲之峻節之以禮  
樂彌增英蕩之華噫考常平置使之規驗熙寧設官之

意六條之察國家之成憲不踰一分之寬儒先之格言  
有味維予雋老奚待訓詞可

朱應元直徽猷閣浙東提刑兼提舉制

朕視東浙如古左馮乃積乃倉常憂百姓之不足宜岸  
宜獄尤期一道之無冤蓋儒者惟知厚民而仁人可以  
聽訟就以雙節畀之能臣爾寬閔而疏通詳練而平實  
湖湘使還之日嘗登汝以九列矣浙河擇使復俾乘軺  
庾政汝優為之而七郡嘉師獄法繁夥惟明慎者盡心



馬峻之貼職以華其行往欽哉使倉廩盈而囷圉空雖古庸使其猶劣諸四牡勞來宜有顯擢可

李鏞除右文殿修撰依舊知紹興府制

會稽太守古尤重於介藩南陽帝鄉今特雄於輔郡既得惟良而作牧毋庸數易以病民爾從容以和縝密以栗飲冰食蘂夙持潔已之聲求牧與芻無負宅生之寄克施有政甚宜其民浙水東七州有嘉治理殿閣十三等莫重集仙肆升論撰之華以獎中和之效鎮臨惟舊

寵渥又新懷印綬歸吏免迎買臣之後以春秋對朕無  
詰嚴助之書祇服訓詞勉建多績可

李鏞依舊秘閣修撰知紹興府浙東安撫使制  
合兩道而建臺已課輸將之績分十連而置帥尤資牧  
御之材爰屬帝鄉密藩行闕况重臨於并部宜愈治於  
潁川爾溫雅而精明端亮而篤實久宣勞於中外亦寢  
歷於清華千里曰王畿既任輓粟飛蜀之事六廉察吏  
治殊高飲冰食蘖之風朕道本愛民任先宅牧爾以脂膏

之身而不潤吾於股肱之郡以得人欲慰豐枌之民式  
廣召棠之政仍聯中秘府之論撰以示東諸侯之表儀  
噫非有所聞豈屢試蕭生於馮翊與我共理庶幾贊漢  
業之中興可

觀文殿學士提舉臨安府洞霄宮李曾伯依舊  
職知慶元府沿海制置使制

朕以槃澗碩人蓋久安於閒燕海濱赤子茲選畀於賢  
良矜言外執政之舊臣宜付東諸侯之重寄有光作屏

特侈揚綸具官某精敏而疏通寬閎而沈毅允文允武  
克壯其猷自東自西不遑寧處早已奮幹方之畧中嘗  
收敵愾之勲惟受任於時艱則利鈍豈能逆覩匪觀人  
於歲晏則是非豈易遽齊居閒久之志念深矣爰下青  
冥之斧鉞起從綠野之園林朕思根本當培固莫如於  
甸服爾幸精神未減猶足偃於魏藩仍職延恩往臨古  
鄖惟良牧為能厚下惟老成可以折衝苛征一洗於爾  
絲威望坐開於鯨浸內綏百粵外控三韓噫率漢千艘

尚想伏波之壯意盡齊四履茂揚表海之高風可

資政殿大學士知慶元府沿海制置使馬天驥  
除觀文殿學士依舊任制

朕視邦東表之雄選侯右府之舊連帥長十國莫如古  
鄖之名藩學士象四時尤峻延恩之邃殿既騰治最爰  
錫璽封具官某識敏而深學閎以博擢高科登顯仕早  
冠伊臯之徒騰茂實蜚英聲中接夔龍之武予其懋簡  
爾尚交脩借箸以籌用幹神兵之柄褰裳而去坐逢鬼

質之謀屬化瑟之久更即建牙而起隱閩嶺多推於善  
政鄞江易鎮於大城郭伋并州再臨恩信素著翁歸東  
海大治姦猾為清三農之穡事告豐萬里之鯨波息鼉  
王省惟歲民功曰庸予懷紫樞之近臣克勤綏撫時則  
清規之峻職庸示褒嘉有赫寵名增崇事任噫維今岵  
夷暘谷之境視昔扶風馮翊之間我澤如春常思篤近  
而舉遠爾身不外其惟固本以寧邦祇服絲綸益圖保  
障可

馬天驤依前觀文殿學士通奉大夫知慶元府

沿海制置使制

朕簡畀大僚蕃宣東表政方成而欲待以久莫如因任之宜吏數易則不安者多孰慰借留之望無煩易轍其就敷綸具官某識慮精明器資宏遠入則間兩社輔公室蓋嘗造辟而言出則倡九牧阜兆民庶幾與我共理自閩山而易鎮於鄞水以殿邦廣中國之至仁海波息警去帝城而不遠河潤蒙休比念右扶更求賢牧惟王者

視邦選侯之計豈憚改為然長吏迎新送故之間實惟  
滋弊徒得君重母俾民勞噫召夷之典南邦不改棠陰  
之蔽帝郭伋之臨并部寧須竹騎之歡迎益懸撫綏嗣  
膺寵渥可

銀青光祿大夫參知政事葉夢鼎特授資政殿  
學士知慶元軍府事兼沿海制置使制

朕臨御初元優禮近弼間兩社而輔公室不果為王留  
行倡九牧以阜兆民庶幾與我共理用敷渙號允穆師



虞具官某厚德鎮浮明謨經遠被遇昭考登進大僚瞻  
帝鄉之雲愴陳末命升暘谷之日協贊重明卜遠攸先  
送終為大躬復土之役甫告因山之成陳負薪之憂忽  
勇急流之退遐不謂矣乃從維之朕念大臣為股肱之  
良人主有體貌之敬訪予落止不能造朝卧而治之猶  
可任郡睠言瀛海實邇天台姑令近甸之建牙何異故  
鄉之衣錦升班遽殿申衍租畬噫儒以道得民往布維  
新之澤王任人共政敢忘求舊之圖倘海表之懷仁則

京師之蒙福可

陳夢斗依舊右文殿脩撰知鎮江府制

吳楚之南大江為之外屏晉宋而下京口實其要衝分  
國顧憂屬時耆舊苟得良牧賢於長城爾恢宏而寬通  
廉平而篤實早勝繁使見謂長材徊翔守刺之間更迭  
中外之久出膺閫制入贊帷籌慷慨時艱無盤根錯節  
典刑歲晚不易葉改柯茲仍邃殿之清班爰付介藩之  
舊鎮蔚棠陰其未改謹竹騎以來迎封植閭閻輯和壁

壘本根用壯其惟強北府之兵機會可圖必有叩中流之楫祇膺妙簡亟懋嘉庸可

右文殿修撰知鎮江府陳夢斗特授集英殿修撰依舊任制

朕視邦建侯莫難擇牧得人因任何必改絃維吾耆舊之良允務軍民之寄晉升熟撰申錫溫綸具官某人有典刑國之耆艾飲水食蘄早已炳於廉聲援鉞典藩晚不移其素守維今京口實重江防以平易近民諒無猛

政以寬靖鎮物足暢威靈乃陟穹班仍臨舊治慨祖述  
中原之志對此山川堅尹鐸晉陽之規厚其保障可

洪勛特授華文閣學士知寧國府制

雙溪疊嶂之清古多賢守一札十行之寵今用詞人睠  
予太常伯之尊列在東諸侯之上假侍從清華之職為  
近臣出處之光具官某行有典刑文諧律呂家學克承  
於堂播父教之忠詞垣繼掌於絲綸世濟其美踐駁既  
久聲實俱孚每嘉簪橐之論思有味履旼之啟沃屢勇

辭於豹尾俄深逝於弋鴻諒其進退之宜畀以蕃宣之  
寄噫聽尚書履暫違嚴徐近侍之班懷太守章往續眺  
白詩人之賦歌襦孔邇召屢斯還可

朝議大夫寶章閣待制江西運使知隆興府洪  
燾磨勘轉中奉大夫制

國家品式備具莫嚴八柄之權侍從獻納論思亦考三  
年之會肆陞卿秩以寵禁塗具官某風猷敏明材業雋  
茂一翁二季相承文字之傳三江五湖尤稔政聲之美

若稽積閔爰進穹階於簪筆持橐以有華與增秩賜金  
而何異噫授官而累日月有愧待賢聞問而對春秋式  
觀奉最可

朝散大夫曹孝慶特授集英殿脩撰知隆興府  
兼江西轉運使制

襟江帶湖之府重於洪都飛芻輓粟之權付之大漕孰  
堪守刺之隆委我有侍從之舊臣具官某賦質溫醇受  
材明敏翺翔班路蓋嘗攬轡登車慷慨言坡以至簪筆

持橐進退有裕寵辱不驚茲予續服之初畀汝起家之  
命曷言統府夙重潛藩大纛高牙控上流而鎮守木牛  
流馬護江右之轉輸匪藉通材曷共二任其升華於熱  
煖爰申錫於溫綸遷表公卿朕欲稽漢循吏之故事令  
脩庭戶爾其遵唐觀察之宏規可

湯漢依舊祕閣修撰改知隆興府制

十國為連既勇辭於閩府一麾出守茲改畀於洪都仍  
其論撰之名付以蕃宣之事爾志尚潔雅理趣深微嚅

道真泳聖涯淵源所漸者遠抗浮雲崇高蹈爵祿可得  
而辭司禮樂於容臺偉衣冠於儲案陳情自列拜疏不  
休式綏牙纛之行莫奪林泉之興睦言南浦夙號价藩  
為爾擇地則為鄰邦為吾選侯則得賢牧無以易此其  
往欽哉登樓讀韓愈之雄詞民樂湖山之外掃榻延徐  
穉之清節士知廉恥之維以此為邦斯能報國可

趙日起除右文殿修撰沿江制置副使兼知江  
州江南西路安撫使制



北斗之幹神樞帷幄方裨於廟算長江之限天塹藩垣  
莫重於中流茲輟儒英式分閫寄其敷詔綍以重帥牙  
具官某趣操端方風猷敏劭吾珍莊也夙見取於蜀材  
獨何蕃與早有聞於唐館自收儒級浸熟兵籌治法征  
謀雍容幕府藩條使節敷歷邊關俾掾宥庭晉承密旨  
睠潯陽之鎮守兼淮浦以扞防上溯下沿撫千艘之水  
擊中權後勁輯萬竈之雲屯民庸茂課於州麾朝序增  
崇於書殿噫訪予落止朕方謹於繼猶幹不庭方爾宜

思於佐辟可



欽定四庫全書

碧梧玩芳集卷六

宋 馬廷鸞 撰

制

端明殿學士知建寧府兼福建運使江萬里除  
資政殿學士依舊任制

漢褒循吏下郡國之璽書唐寵藩臣賜便殿之衣物矧  
我阜陵之潛邸付之樞筦之舊儒亮米有邦治理著惟  
良之效式序在位寵名高特置之班具官某學自丘軻

道陳堯舜文章行世則江河萬古之流論諫憂時則仁義百篇之奏積由人望擢在政塗同寅協恭夙已間兩社而輔公室宣德流化又煩倡九牧以阜兆民閩之輿樞建為盛府大僚貴倨汝則平易近民浮俗夸奢汝則清脩苦節治有異等人無間言既奏最於雄藩合升華於秘殿事權增重恩數又新噫朕皆知之無曰建州之云遠民之望也姑為頽土而借留益懋旬宣嗣膺簡注可

資政殿學士知建寧府兼福建運使江萬里依  
前職知福州福建安撫使制

朕惠顧甌閩簡求師帥一州敘惠既煩兩地之舊臣十  
國為連就付三山之巨屏具官某鼎彝王臣之威重斗  
山儒者之宗師臯陶為帝謨庶明勵翼申伯績王事四  
國于藩樞莞望尊建府地大我與共理豈誇增秩賜金  
之榮時方阻饑克任求牧與芻之責諒歡傳於歌袴宜  
就畀於建牙士曰時哉必興其賢能者民亦勞止又從

而振德之用式南邦以藩東越噫敏中以大臣臨重鎮  
事必盡心常袞以文詞進小民俗宜皆化繫予雋老奚  
俟訓詞可

宣奉大夫楊棟特投資政殿學士知建寧府制  
執政吾股肱嘗共一堂之寅協郡守民師帥尚資九牧  
之阜成陟秘殿之穹班撫儒書之舊國具官某鈞深致  
遠實大聲闕君子多識前言茂明古學儒者在朝美政  
屢告宸猷自秉事樞晉陪機務本精神之相得亦禮貌

之未哀有政其與聞之吾方倚重責言不可償也人或  
求全升之隆名付以鉅鎮蓋曲全於進退仍允賴於蕃  
宣噫考亭義理之源上泝闕洛建安文物之郡遠比泗  
洙平時既熟於講明今日遂施於教化卿優為矣朕有  
望焉可

印應雷除右文殿修撰知福州制

朕設張初政軫念遐方視邦選侯況有十連之重寄襟  
山帶海孰如七聚之名蕃宜擇循良往敷慈惠爾抱能



甚裕更事孔多緩帶輕裘嘗懋幹方之績杜門掃軌屢  
稽造闕之行維東甌之奧區以長樂為會府華之論撰  
命以鎮臨士曰時哉咸迪薰陶之化民亦勞止翕歸摩  
撫之仁亮采有邦祇若予訓可

湯漢除秘閣修撰知福州制

朕內諮宿儒外建良牧在朝美政莫肯為王留行視邦  
選侯庶幾與我共理茲入典奉常之禮樂乃出敷元帥  
之詩書爾學有淵源行無緇磷名早立而身易退操久

幽而志不渝甫諧盍簪之期覽輝而下屢起褰裳之興  
拜疏不休既諒乃忱姑徇其請特峻蓬山之論擬往顓  
閩聞之蕃宣昔攬轡登車無憚大吏今開府作牧用康  
小民何必立朝乃能報國噫仲舒厭事雖不樂於京師  
子牟存心豈頓忘於魏闕伊身名之俱泰斯中外以無  
殊往則及瓜召無俟駕可

太中大夫常挺授寶章閣學士知漳州制

朕參稽師言如持衡尺愛惜臣子如護珪璋苟能守道

守官允藉為綱為紀雖責言不可償也然有過人皆見之斷自上恩優之外服假侍從清華之職為近臣進退之光具官某蚤擢高科寢登華貫自論思獻納峻升文石之班絲潤色討論遂陟黃扉之秩既優居於三省爰寵畀於一麾王道無黨無偏本乎至正君子或出或處初亦何常噫南漳名藩西清妙選及瓜而代尚觀千里之歌襦與環則還何待三年之奉計增而亮節體我眷懷可

江萬頃除福建市舶制

海市分珍裨於國計輜軒錫寵予以使權爾父兄之學  
克傳縉紳之望尤偉頃登藩最益無愁歎之聲迨列班  
行有不吐茹之節冰蘖自厲水鏡其明言曳朝裾往司  
集貨允藉不貪之寶庶還既去之珠服此訓詞增而績  
用可

陳日熉特賜效忠順化保節守義懷德歸仁慕  
治奉正致恭履信崇禮安善功臣特授檢校太

師特封安南國太國王加食邑實封制

門下朕誕膺景命初履鴻圖四海之內皆徠臣既錫普  
天之澤九州之外世壹見詎遺出日之區雖高懷於爵  
祿亦可辭然寵數在朝廷而有典播之明命責爾遐方  
具官某早殫恪勤晚怙沖挹心存帝室嘗率職以無違  
業紹家庭益效忠而不替每念輸忱之素尤嘉高蹈之  
風屬此纂承誕敷慶賜是父是子宜均拜於徽章來享  
來王蓋協循於常度優加功號增衍畬租茲爰舉於邦

彝庶有光於蕃服於戲帶黃河礪岱岳朕方申固於勛  
盟挹浮丘拍洪崖爾尚永綏於壽祉勉而奕世拱我明  
時可

端明殿學士正奉大夫簽書樞密院事兼權叅  
知政事兼太子賓客楊棟宣奉大夫加恩制

朕永惟邦本肇建儲闈首招綺園領四人而入侍旋倚  
望爽叅三少以與游荐逢華橐之周宜峻穹階之陟盖  
念終始典於學豈積日月以為功是彰綸綍之新式獎

範模之舊具官某德直方大學純粹精選衆舉臯陶暨  
益稷而同列敬王如孟子非堯舜以不陳吾求千載而  
上之真儒欲起三代以前之善政與賢者共方將築太  
平之基從吾兒游又以翼仁孝之德琢磨令範斧藻大  
猷豈無端人正士之後先道之教訓必有元老大臣之  
領袖重於典刑賢聖藹聞溫文炳著時考則可矣適觀  
三年之成爵與爾縻之何辭一秩之寵仍增陪於井賦  
併申錫於渙綸以昭殊恩以獎懋績噫春秋冬夏無非

教既酬歲會之庸師保疑丞惟其人更覲日新之益尚  
資鴻翼以永燕詒可

呂文德特授少保職任依舊加食邑實封制

朕紹丕圖睠時英傑屬大事當一面久著績於幹方立  
少保曰三孤首疏恩於進律況輯瑞於頒朝之日乃聽  
輦而思帥之初爰簡剛辰誕敷列辟具官某沈雄有守  
英果無前家傳籌畧於渭濱世擅勲名於江表左護軍  
陳計納策下南郡以定荊州大司馬清身奉公分武昌



以督右部豈其苗裔念茲戎功頃清漢鄂之氛埃再洗  
岷峨之悽愴據荆出益未嘗忘北方之圖首蜀尾吳亟  
欲重上流之勢錫之雙節整我六師足食足兵惟征惟  
築寇行如鬼臨江復擬於投鞭將通於神咎敵不勞其  
折箠茲歲華之晏粲喜邊信之平寧朕臨涖方新佇毗  
維舊惟孝祖初膺於大統惟吳璘特表於殊庸繡綬在  
裳煥貳公之典冊琚戈導節兼舊鎮之威儀申衍戶封  
陪當邑采壯矣軍容之重煥乎命數之隆式循昭代之

龔章勿替先皇之殊過於戲惟明於任人者善繼其志  
惟忠於事主者不貳其心歷觀古人可驗今日周亞夫  
將兵再世迄能守節以有勲郭子儀受命先朝惟以效  
忠而永譽予欲固封疆之備爾思承閔閱之勞茂對寵  
光益恢遠畧可

賜告口宣

卿久專閫寄克靜邊虞昨開兩鎮之雄茲陟貳公之峻  
體予初服祇我明綸

楊棟該遇明堂大禮加恩制

惟我仁宗備法駕而嚴宗祀有臣貽永典儀仗以參使  
華霖晦為之霽明辰象於焉炳著備承熙事肅倡和聲  
天惟休於前人既昭假爾我式至於今日亦右享之聿  
觀慶成咸被慈告具官某行高當世才比先民道宗洙  
泗之間孔子乃所願學文溯巴江而上揚雄最其善鳴  
久自禁塗峻登政地深惟虞周盛際莫謹類禋吾有齊  
魯大臣可興禮樂哀時景貺稽古曠文本朝以癸亥祀

南郊肇皇基之億萬年漢人以辛巳祠泰時現景光於  
十一月爰命宗工式昭使範偉山立而玉色導星陳而  
天行攝以威儀滌以裸獻同其福祿錫之土田溥三神  
之釐厚九重之眷噫伊陟暨臣扈咸陳格帝之功君奭  
旅周公恪盡供王之敬以祈永命惟有歷年可

同知樞密院事楊棟曾祖已贈太子太保光庭  
特贈少保制

朕載覽甘泉錫羨之賦庶幾清廟顯相之詩蜀魚他楊

樞輔豈同其苗裔周有大賚魯門爰賁之寵榮宜刻愍  
書以昭餽澤具官某故曾祖具官某世業傳渭濱之畧  
家聲冠汾陽之科援枹鼓而忘身獨懷忠槩執干戈而  
衛社夙負壯圖撫躬淹志士之發揚裕後啟賢人之久  
大遂相九筵之典乃疏三廟之封拱木為之高華班棘  
於焉通顯噫祭十倫而同福祿孰加古少保之官德百  
世而推源流尚食晉太傅之邑可

曾祖母歷陽郡夫人程氏特贈和國夫人制

精裡帝祖福既被於八埏加惠臣鄰爵必通於三世可  
無國典以耀母儀具官某故曾祖母具位某氏德茂以  
明性柔能正越若掾曹之祖力爭獄戶之囚下無冤民  
盖有廷尉平之譽家多陰德併及外曾孫之賢方冊以  
為美談雲初享其餘慶登吾右府又爾後人有來相予  
既備成於熙事亦其福汝爰申錫於愍章錫號小君已  
正魚軒之貴易封成國更增馬鬣之榮識與未淪顧歆  
休渥可

又曾祖母歷陽郡夫人程氏贈和國夫人制

精裡帝祖福既被於八埏加惠臣鄰爵必通於三世可  
無國典以耀母儀具官某故曾祖母具位某氏柔嘉處  
躬專靜持則傳稱繼室克嗣元妃之芳詩詠宜家載衍  
聞孫之慶參裁密務顯相宗祈屬茲熙事之成可後慶  
條之舉遂荒列國亦曰君夫人垂佑後人則無遺壽者  
可

祖已贈太子太傅知章特贈少傅制

九筵秩祀所以配天兩社均釐則知尊祖宜頒愍錫以  
發幽潛具官某故祖具官某秀稟岷山書傳渭水倘詢  
智畧可以借前箸籌之俾扞邊陲知其賢長城遠矣惜  
不酬於壯志宜衍慶於後人子又生孫峻膺兵本之寄  
聖能饗帝爰殫使範之宜乃廣靈禴載申贈典噫羣公  
相予肆祀合敷祭澤之華少傳茲曰三孤永作泉塗之  
賁可

祖母和政郡夫人宋氏贈惠國夫人制



惟典神天必嚴宗祀烝畀祖妣爰寵輔臣宜以徽章美  
於幽祔具官某故祖母具位某氏秉心溫靚率履柔嘉  
無蜀他楊既得名家之配必宋之子良欽懿範之賢鍾  
爾聞孫為吾碩輔秩九筵而相禮于三世以均隆寵渙  
魚軒已正小君之號榮增馬鬣更開成國之封耀爾下  
泉享於新邑可

父已贈太子太師端仲特贈少師制

朕虔恭帝祖於九筵慨念君臣之一體淚落廟俎不勝

予嚴父之思塵侵萊衣亦揆爾顯親之志睠樞廷之相  
祀於禰廟以追榮具官某故父具官某胸雖常貯於甲  
兵手不停披於玄草人生五馬焉能使予不遇哉庭植  
三槐必知吾子有興者袞繡果榮於後嗣旂常克相於  
精裡乃袞神釐用敷愍冊噫上有澤下及其惠式旌祭  
統之十倫子能仕父教之忠斯冠周官之三少是有慶  
矣其與享之可

母琅琊郡夫人史氏贈通國夫人制

以配上帝國家既謹於奉先爰有寒泉輔弼亦勤於念  
母宜裒神貺用刻愍書具官某故母具位某氏柔順積  
中閑和率性昭其女訓夙漸漬於令儀宜為母師有汪  
洋之淑問慶鍾子舍位陟樞庭茲拜貺於明堂遂徙封  
於望國彤管有煒寢颺竹帛之芳象服是宜可作斧堂  
之賁營魂不昧勿替引之可

母博平郡夫人朱氏贈義國夫人制

以配上帝國家既謹於奉先爰有寒泉輔弼亦勤於念

母宜裛神貺用刻愍書具官某故母某位某氏莊重凝  
姿幽閒植性元妃之有繼室嗣昭鴻案之儀邦君之稱  
夫人益艷魚軒之寵慶鍾子室位陟樞庭茲拜貺於明  
堂遂徙封於望國彤管有煒浸颺竹帛之芳象服是宜  
可作斧堂之賁營魂不昧勿替引之可

故妻文安郡夫人孫氏特贈吳興郡夫人制


國家之敷祭澤無遠近幽深輔弼之念中閨有死生契  
濶往昭廟祐其侈綸言具官某故妻某位某氏惠問藹

存芳猷夙著其儀不忒是為女婦之師而生有涯莫覩  
公台之貴茲覃餽惠是錫愍書安且吉兮改畀苕溪之  
望郡歿不朽矣尚昭藻澗之潛光可

今妻通義郡夫人孫氏特封同安郡夫人制

燔燎煬晨國家嚴精禋之典采蘋供祀輔弼有宗禋之  
承茂輯靈禔以華中間具官某妻具位某氏閑和中節  
溫惠成儀君稱之曰夫人早正笄珈之美婦能勉其君  
子無慙竹帛之傳茲拜貺於合宮遂易封於望郡錫龍

舒之嘉號允有邦彝祇象服之褒章益隆閭範可



--	--	--	--	--	--	--	--	--

欽定四庫全書

集部

碧梧玩芳集卷七

九至

詳校官庶吉士臣張溥

主事臣呂雲棟覆勘

謄錄副貢生臣杭光晉



欽定四庫全書

碧梧玩芳集卷七

宋 馬廷鸞 撰

制

葉夢鼎該遇明堂大禮加恩制

朕涓選吉辛肇修宗祀旂常婀娜盛供帳之皇儀羽衛  
周張肅鹵簿之使領孰膺隆委我有近臣蓋乾德之命  
張昭實癸亥親郊之始皇祐之詔龐籍亦庚寅大饗之  
初既慶熙成咸被慈告具官某佐王事業經國謀猷選

自三雍海流道德之富間于兩社山立廊廟之才既殫  
基命之勤斯懋格天之績相予肆祀賚我思成法駕安  
行先三日而雨卷霧霽明庭對越秩九筵而月穆日華  
神來宴娛祭則受福敢朕躬之專嚮于政路以均釐多  
井倍加真腴申衍噫吉蠲而誦天保甫膺如川方至之  
休旅命而作嘉禾已有異畝同穎之瑞惟上下之勤恤  
庶天人之充和可

洪勲該遇明堂大禮加恩制

朕恪修宗祀屢奏孝熙明堂在國陽歎殊庭而日華月  
穆司馬掌邦政備法駕而星陳天行有嘉宣勞宜均拜  
昨具官某家擅文章之錄人推典刑之宗東馬齊飛視  
草世絲綸之美夔龍接武納言超筆橐之英予卜秋辛  
以歲上儀汝掌夏官而司內制太宰之贊王命卿士民  
庶肅然有聞祝史之奉正辭天地祖宗臨之在上十二  
駕龍之整雅三千組練之訓齊迄底熙成實多顯相宜  
頒惠澤申衍新畬噫戴經之敘十倫必施爵賞周官之

命諸子爰啓封疆祇服寵靈益殫獻納可

洪勲洪燾父諡忠文已贈特進咨夔贈少保制

朕嚴恭帝祖均惠臣鄰五室九筵稱秩元祀一翁二季  
尚有典刑昭予祭澤之敷慰爾孝思之切具官某故父  
具官某崇論宏議欲起端拱咸平之治功全節高風不  
愧慶厯元祐之君子集茲嘉慶是啟象賢兄為元方弟  
為季方並登禁路子執穀璧男執蒲璧咸侈國風因竣  
事於合宮併追榮於禰廟噫亮天地而貳公弘化雖僅

見於愍書顯父母以立身揚名猶足昭於義訓可

母吳郡夫人阮氏贈吉國夫人制

餒君之餘必有露蕭之澤無母何恃以紓風木之悲具  
官某故母具封某氏德合箴圖行隆閨闔于彼行潦生  
而躬藻澗之勤爰有寒泉歿益重棘心之感二惠競爽  
九原有光已賁魚軒嘗以郡封而賜沐茲申鸞誥肆由  
國壤以疏綸尚其淑靈克歆愍典可

年子才父已贈太中大夫桂特贈通議大夫制

賢者在朝美政既陟崇階君子篤親興仁宜加愍冊肆  
俾從班之老特追禰廟之榮具官某故父具官某仙井  
鍾奇儒科擢秀文聲藉甚江漢炳靈世載其英誼槩卓  
然松栢後凋不改其操如用之賢長城遠矣乃不及取  
一障乘之畸於人而侔於天非其身而在其子崇論宏  
議忠言嘉謨擢登星履之華式霈露蕭之澤宜加一秩  
以賁九原噫子年存闕之心凜其未泯孤突教忠之報  
於此有光可

妻恭人喻氏贈令人制

夫尊於朝莫峻陟明之典婦歎於室靡諧偕老之期乃以徽章布諸沈施具官某故妻某氏柔嘉宅志專靜處躬青衫陋公卿猶勉以正象服宜君子不逮於存用錫美稱以華幽壤庶吾八座之老母重五噫之懷忘泣牛衣中耶既莫同於通顯有若馬鬣者矣其尚格於杳冥可

姚希得該遇明堂大禮加恩制

從昆侖而拜祀既竣事于園宮橫大江兮揚靈肆均釐  
於制閭迺推餽惠式茂徽章具官某蜀珍顒印和璧瓌  
偉有貫穿古今之學有酬酢事物之才十國為連莫重  
高牙之寄兩都相望實兼留鑰之雄馬騰于槽民狎其  
野黃旗紫蓋厚培王氣之休嘉玉璫黃流交鬯景光之  
震澹其均拜胙庸示疏綸辨等以正儀加地而進律噫王  
入太室既殫我將我享之忱伯執躬圭爰錫爾公爾侯  
之祉哀時之對克壯其猷可



李庭芝該遇明堂大禮加恩制

汶上明堂之圖式謹園宮之祀淮浦王師之所有嘉專  
閩之英其敷寵章以昭餽澤具官某山嶽渟峙圭璋粹  
溫晏嬰仁人坐制兩楹之勝柳渾儒者足知萬里之情  
以高牙大纛而鎮全淮如緩帶輕裘之臨古峴十乘之  
行先啟允賴壯猷九筵之祀丕崇迄成熙事倘匪戎亭  
之虛候曷由太室之精裡觀載馳驅猶駿奔走有隆賜  
胙式表均釐噫帝臨中壇光十一月而拜祀男執蒲璧

邑三百戶以疏恩祇膺啟宇之恩益茂幹方之略可

李庭芝父唐臣贈朝奉大夫制

明堂九筵甫畢合宮之祀元戎十乘眷懷專閫之臣宜  
以徽章賁其禰廟具官某故父具官某處躬素履玩心  
黃中盤谷林泉自適丈夫之進退出處漢東典籍鍾為  
元帥之禮樂詩書乃其嗣人為國良翰屬告成於裡祀  
方飲福於臣鄰能仕而父教忠既足當於一面欲養而  
親不待其加寵於九原服我茂恩以華幽壤可

母張氏贈碩人制

國家嚴父之禮克配彼天臣子念親之懷靡依匪母寵  
予方閭賁厥妣筵具官某故母具位某氏迪德溫恭宅  
心慈恕相其夫子不辭井臼之勤裕乃後人克任藩垣  
之寄茲因餒惠復峻徽章淮海維揚州式資良翰寒泉  
在浚下尚慰孝思可

妻宜人徐氏特贈碩人制

在國之陽屬舉精禋之典配天其澤肆頒惠術之彝時

維方聞之英蓋有中閨之助茲因祭餼申錫恩言具官  
某妻具封某氏有壺彝之清規為禁從之良配敬而宗  
祀勤南澗祭祀之供助我元戎任東閩藩宣之寄遠均  
釐於宣室爰錫祉於庶邦碩人其碩無愧錦衣之賦君  
子偕老有華象服之宜祇佩徽章益昭淑範可

呂文德依前官職加恩制

門下朕恪修宗祀涓選吉辛崇明堂而度九筵丕視郊  
丘之盛禮屬大事而當一面興懷疆場之元勳况撫師

承德以良勤豈受賑執膳而有異其敷祭澤式獎戎昭  
具官某智勇冠時忠忱許國如飛如翰如江如漢豈惟  
收淮浦之功非龍非虜非虎非羆蓋屢奮礮溪之略萬  
人吾往四方既平剪叛而帥三軍有崇文克蜀江之險  
堅邊而築百堵用李勣賢朔方之城比稽上古之彝儀  
爰謹季秋之大報滅風卧鼓喜虛候於戎亭奉幣執珪  
獲嚴禋於太室戰則克而祭受福外無患而內以寧紛  
旂常之拱北辰獨節鉞之鎮南紀師象山則每嘉將良

兵利之奇臚驩天歌亦念士飽馬騰之盛既成熙事斯  
錫神釐是豐多井之輸仍衍真腴之入於戲聖人之祭  
見爵賞矧酬衛社之勞天下之將通神明益懋幹方之  
烈必君仁而臣敬斯天祐以人從永肩一心思皇多祐  
可

口宣

有勅宗祀明堂既受帝祉大賚四海肇敏戎公申衍豐  
租式均惠餒益侈在師之錫無忘拜昨之恭

江萬里該遇明堂大禮加恩制

朕獲執珪幣恪恭神人明堂秩九筵昭予肆祀公輔間  
兩社懷我邇聯用頒餒澤之新以寵樞庭之舊矧嘉良  
翰誕錫明縉具官某斯文羽儀學者師表色正芒寒之  
始鴻名已塞堪輿根茂實遂之餘大論可著廊廟乃眷  
七閩之鉅鎮特煩二府之元臣其自時配天屬舉路庭  
之禮雖爾身在外宜均宣室之釐申衍爰田用昭惠術  
噫先王望祀為百姓朕敢懷專嚮之私天子嘉禮在大

臣爾尚體同福之意祇膺帝貺益告辰猷可

江萬里曾祖瑛贈太子太保制

朕登延舊弼翊贊鴻樞我儀圖之既進賢於密勿德積載也乃原始於高曾具官某故曾祖具官某抱節陸沈懷材蠖屈渾金璞玉鄉里稱為善人枕石漱流山林遂其隱操一門所積三世其昌宜爾子孫為予碩輔陟儲宮之上保載錫之光賁私廟之愍章乃終有慶可

曾祖母齊郡夫人沈氏贈清源郡夫人制



位陟副樞之列本我五兵恩疏刻密之章及其三世念  
茲重祖之配可後九原之榮具官某故祖母具位某氏  
淑慎為儀令柔作則傳稱成德敬冀缺以如賓史著芳  
名與梁鴻而俱隱慶鍾未艾善積有餘宜爾聞孫為予  
碩輔學士尊祖况追賁於曾門夫人起家用申榮於泉  
戶懿靈如在茂渥其承可

曾祖母恩平郡夫人葉氏贈安定郡夫人制

位陟副樞之列本我五兵恩疏刻密之章及其三世念

茲重祖之繼室可後九原之愍書具官某故曾祖母具  
位某氏稟性惠和修身淑謹同夫偕隱何愧褐裘與佛  
有緣自翻貝葉慶鍾未艾善積有餘宜爾文孫為予碩  
輔學士尊祖况追賁於曾門夫人起家用申榮於泉戶  
懿靈如在茂渥其承可

祖璘贈太子太傅制

后德惟臣况延登於樞輔人本乎祖宜申錫於愍書具  
官某故祖具官某學本師心跡同辟世濯滄浪之水足

以潔身居畏壘之山從而厲俗對聖賢而自樂知爵祿之可辭善則有餘慶宜未艾茲予近輔乃爾聞孫太傅在前遂陟儲宮之貴秩賢者有後斯為奕禩之寵光精爽如存歆承不昧可

祖母信安郡夫人巢氏贈安康郡夫人制

體貌大臣追榮私廟烝畀祖妣申錫泉局是加刻密之章以達含飴之報具官某故祖母具位某氏宅心淵靜植德溫柔節婉鴻妻隱深山之裘褐慈如陶母饌前榮

之賓親流慶甚長有孫而顯再陟紫樞之峻申加綵誥  
之華起家而稱夫人用易新封之湯沐逮事而諱王母  
增光故壤之松楸可

父華贈太子太師制

門令容蓋古人固有陰功庭自植槐近世以為佳話必  
若盡在三之義其惟教不貳之忠我有近臣追榮穀誨  
具官某故父具官某學深源委性質直方仕而輕結綬  
之榮柔不茹剛不吐居則謹佩韋之戒語有法默有思

蹈前修之典刑揭後學之師表位不滿德實浮於名宜  
吾廊廟之英出爾階庭之彥噫兩社為公輔載揚家訓  
之遺芳九原從大夫宜對宮師之殊寵可

母普寧郡夫人陳氏贈永寧郡夫人制

惟我有臣既薦登於兩地靡依匪母宜重感於九原推  
其至情錫之愍典具官某故母具位某氏令儀可則柔  
範有聞內睦外嫻蚤著閨闈之肅穆夫榮子貴晚觀門  
地之顯融既纏風木之深悲莫覲丰樞之盛事采蘋有

報易湯沐之新封吹棘是懷貢松楸之故壤可

妻通義郡夫人黃氏贈南康郡夫人制

臣事君以忠入躋樞筦婦從夫之爵下及閨門雖不幸而悼亡亦必申之愍錫厚之至也榮孰大焉具官某故妻具位某氏賦性柔明持身專靜勉其君子蚤輸謇諤之忱宜厥家人允極睦婣之美迹此延登之貴追懷內助之賢已錫魚軒申加鸞誥義莫崇於伉儷恩寧間於幽明惟其有之斯致鵲巢之應如可作也尚榮馬鬣之

封可

史宇之該遇明堂大禮加恩制

朕合宮致饗宣室受釐禮重九筵既迪熙成之盛典恩均二府有懷勲烈之嗣人宜布新榮以旌夙望具官某處躬篤厚履行粹夷永言宣孟之忠為善有後能復周公之宇其德克明出殿藩維入儀公輔不顯亦世是謂喬木之臣所去見思綽有甘棠之政慈養優游於里第穹班峻陟於殿庭茲衍賦畀以昭祭澤噫書于旂常彝

鼎朕靡忘先正之勲錫之山川土田爾益懋象賢之業  
可

李曾伯該遇明堂大禮加恩制

朕合宮致饗宣室受釐禮重九筵既迪熙成之典恩均  
二府有懷壽俊之臣宜布新榮以旌夙望具官某賦資  
凝重植量恢洪十乘元戎嘗倚幹方而佐辟四郊多壘  
輒勤敵愾以折衝壯懷蚤際於風雲暮齒自安於泉石  
瞻言耆德簡在深衷其自時配天式展親祠之敬雖爾



身在外共霑拜昨之華用錫渙綸申加并賦噫四海來  
格靈禔已霑於蓼蕭三壽作朋文獻尚存於喬木茂膺  
帝賚益告辰猷可

馬光祖該遇明堂大禮加恩制

朕獲執珪幣恪恭神人明堂秩九筵昭予肆祀公輔間  
兩社懷我近臣用頒餼澤之新以寵樞庭之舊式彰褒  
律誕錫明綬具官某肅括而洪深精明而果毅高牙大  
纛出而成方名之勲玄圭袞裳入則蓬夔龍之列偉績

兩都之尹正至忱四輔之寅恭其自時配天屬舉路庭之禮雖爾身在外宜均宣室之釐申衍爰田用昭惠術噫先王望祀為百姓朕敢懷專嚮之私天子加禮在大臣爾尚體同福之意祇膺帝貺益告辰猷可

徐復該遇明堂大禮加恩制

堂崇九筵聖惟能饗網去三面民不自冤顧如司刑之臣可後均釐之典其敷祭澤以寵禁塗具官某悃悞無華靖恭有守篤厚知大體有漢庭長者之風老成重典

刑蓋周家獻臣之望玉乘鸞輅金揭雞竿既相祀於甘  
泉復奉書於丹鳳式敬爾獄俾裕我民錫以渙綸加之  
并賦噫合宮之聽總章之訪朕式體於前猷太末之里  
姑蔑之墟爾復開於故國可



欽定四庫全書

碧梧玩芳集卷八

宋 馬廷鸞 撰

制

趙葵依前少保觀文殿大學士充醴泉觀使加  
恩制

朕齋潔精裡眷懷宿望注想待元老時維將相之英富  
貴歸故鄉均拜神明之胙爰敷餽澤式渙新綸具官某  
天挺壯猷家傳義槩父菑子播夙高當世之勲仲雪伯

霜獨擅一門之譽嘗慷慨奮安邊之略其經營陋畫江  
之圖雪恥除凶有封狼居胥之志執訊獲醜有截鯨奔  
沛之功雖四方不已于行然三公不易其介廊廟江湖  
之心靡間園林鐘鼓之樂未央明堂度九筵屬稱元祀  
公輔間兩社慨念舊臣望喬木之猶存宜蓼蕭之首被  
大國易三河之名壤真畚陪多井之殊恩以昭靈禩以  
崇徽數於戲昔仁祖御圖之日當皇祐親饗之年稽古  
禮文肇舉國南之典睠時勲舊載新冀北之封尚企前

猷永綏壽履可

口宣

類帝禋宗既齋明而秩祀出將入相於耆舊以均釐丕  
衍多田進封大國其承渙渥益介殊祥

趙葵曾祖太師冀國公世勲贈豫國公制

朕修欽天事地之彝典既竣事於合宮睠出將入相之  
舊臣俾均釐於曾廟肆頒餽澤追賁愍章具官某故曾  
祖具官某實浮於名位不滿德門間有興者蚤已驗於

肥家鄉里稱善人蓋素懷於濟物積有餘慶燕及重孫  
再世臨邊既身為於羊陸一堂輔政嘗武接於夔龍屬  
典禮之熙成邈淵源而錫祉噫冀之北土夙開成國之  
封豫界南河申析大邦之壤寵光優渥英爽歆承可

曾祖母吳國夫人朱氏贈豫國夫人制

備欽柴之禮臣餞君之餘申錫沐之封婦崇夫之爵均  
釐舊弼追責曾門具官某故曾祖母具位某氏秉德和  
柔宅心慈恕祀謹蘋蘩之職可以承先慶鍾梁棟之臣



是能燾後肆秩九筵之熙事爰崇三世之愍書噫稽汶  
上之圖既昭靈貺析河南之壤益修舊封苗裔有光熾  
昌未艾可

祖太師徐國公棠贈荊國公制

明堂秩九筵備成熙事大夫祭五鼎厥有彝章嘉台衡  
勲舊之臣錫祖廟追榮之典具官某故祖具官某高懷  
磊落壯志慨慷師友淵源蚤事南陽之大老聖賢指趣  
晚交廣漢之醇儒其存者長所漸愈遠是生名子守邊

崇方名之勲燕及聞孫輔政遙臯夔之列屬奏熙於宗  
祀必同福於大僚愍典被之慶源深矣噫遂荒徐宅名  
邦已肇於始封至于荆山大國宜加於申命可

祖母燕國夫人楊氏贈荊國夫人制

類于帝裡于宗元祀秩九筵之禮過其祖遇其妣大僚  
追再世之榮具官某故祖母具位某氏簡澹無華溫恭  
有度于彼沼沚是共祀藻之虔生於階庭茂格孫蘭之  
慶睠近臣之同福于王母以疏恩熙事既成彝章可後

噫學士尊祖所宜餽澤之均夫人起家永作泉塗之賁  
可

父太師漢國公諡忠肅方贈潭國公制

朕寅祀神天均釐勲舊上有澤下及其惠厥有彝章子  
能仕父教之忠是頒愍典具官某故父具官某邦之良  
翰國之寶臣十載元戎其賢長城遠矣一時殘寇可折  
尺莖答之嗟義槩以猶存凜遺勲其未泯卓哉人傑所  
謂南方之強裕乃父功尤幸西平有子屬成熙事載錫

徽章噫昔峴首臨邊興懷羊祜之烈茲長沙開國益明  
吳芮之忠英爽如存慶源有衍可

母雍國夫人胡氏贈潭國夫人制

國家嚴父對皇天后土之臨臣子念親有凱風寒泉之  
感宰席睠勛勞之舊妣筵加愍錫之新具官某故母具  
位某氏生自儒家嬪于勝士能勉其君子元戎集疆場  
之勲稱之曰夫人象服有山河之德階庭餘慶廊廟舊  
人屬臻熙事之成宜賁徽章之寵昔荒秦雍已開大國

之封茲易衡湘益侈本邦之錫淑靈不昧肸蠁其承可

妻德國夫人李氏贈鄧國夫人制

三事均釐允極夫尊而妻貴九原愍錫永念生榮而死  
哀方推舊弼之殊恩爰錫中閨之贈典具官某故妻某  
氏體柔明之度躬幽閒之風生也有涯既不恨牛衣之  
泣歿而不朽亦庶幾象服之宜餽澤式頒徽章有侈噫  
親祠泰時既流拒鬯之馨賜沐南陽永作松楸之賁淑  
靈如在光寵知歆可

劉克莊該遇明堂大禮加恩制

朕嚴裡上帝第頌侍臣宣室方坐受釐每懷思誼周南  
不與從事頗憶滯談宜有徽章以昭惠餒具官某詞華  
宿老獻納邇聯聞正始之音大雅為之復作下建中之  
詔斯文可以中興甫聽履而上星辰旋把麾而去江海  
比崇宗祀緬想舊儒賜文武之胙以必均豈嚴吾之列  
而可後車回丹鳳當年語妙於恩書竿揭金雞今日寵  
榮於耆德申陪井賦誕錫渙綸噫王搢大圭既秩九筵

之禮子執穀璧載加五等之封畫接用康辰猷佇告可  
劉克莊母方氏贈魯國夫人制

國家嚴父對皇天后土之臨臣子念親有凱風下泉之  
感肆恩禁路追賁妣筵具官某故母具位某氏莊重凝  
姿幽閒植性采蘋而于沼沚可以承先聽履而上星辰  
是能裕後疊此象軸錦韜之貴積為松阡栢冢之華粵  
予既薦於馨香繫爾申加於湯沐噫祀于洛邑方將第  
清廟之詩保彼魯邦亦何歎閼宮之頌淑靈未昧愍典

其承可

繼母林氏贈魏國夫人制

朕蒐奉高之上儀睠甘泉之法從淚落廟俎雖未助予  
惻楚之懷塵侵萊衣豈不念爾顯揚之志其廣露蕭之  
澤以紓風木之悲具官某故繼母具位某氏生自義門  
嬪于勝士嚴於閨閭鍾郝之禮法有稽課以圖書班馬  
之史編尤熟母儀甚偉禪悅更深輝華感繡之簾雜沓  
泥金之誥既有子逮千鍾之養復從夫享五鼎之榮比



舉精裡申加愍典大邦錫寵不侈汾曲之封後嗣能賢  
自草瀧岡之表可

妻碩人林氏贈淑人制

嚴恭帝祖昭予宮廟之丕欽均惠臣工俾爾室家之同  
福既失澗蘋之助用為冢栢之榮具官某故妻具位某  
氏生中興忠義之門蹈名家禮法之訓父母舅姑之所  
曾無間言搢紳儒先之流指為內則與歲皆逝其生有  
涯賢哉大夫簪橐之榮至矣釐爾女士并白之感何如

茲屬熙成肆頒惠餒君子宜偕老也雖不幸而悼亡淑人其儀一兮尚克歆於愍錫可

陳威晃依前安南國王加恩制

門下朕肇稱元祀涓選吉辛其自時配皇天既迪熙成之典推而放諸四海式均大賚之仁眷時南服之英世慕中華之美載敷靈貺爰錫徽章具官某浴義浸仁履謙蹈信父菑子肯播嗣分茅土之榮臣事君以忠時謹梯航之貢無替厥服曰篤不忘屬時景運之隆丕講精

裡之盛先以雨而般裔裔大明升空委如山而瑞穰穰  
嘉禾同穎庶邦丕享四極爰轡帝歌卿雲爛兮遠占華  
旦天無烈風久矣遐想至仁載嘉象譯之來煥發鴻臚  
之詔有慶則益地申衍賦租惟名不假人用增勲號以  
大九圍之式以昭三神之釐於戲惠宗公而罔時怨恫  
斯霈露零之澤勞天下而無私覆載靡遺日出之區祇  
服寵榮永肩恭順可

少師保寧軍節度使衛國公致仕謝燮昌特贈

太保追封淮海郡王制

朕載稽典彝用宏嫺睦九原歎逝追懷戚畹之英三太  
宗終併侈王封之貴式昭寵數申錫愍書具官某濟美  
槐庭聯輝椒屋兄弟式相好矣有韓鄂華國家禮亦宜  
之莫崇位棘茨若溫恭之懿澹然夷雅之資居里第而  
避遠勢權飭家庭以迪聞詩禮朕欲基二南之王化有  
關睢麟趾之風爾能儀四姓之族嫺無流水游龍之習  
甚念睦親而民歸厚詎期殄瘁而人云亡嗟惟中閨素

篤同氣不遺一老曷舒則友之情豈伊異人彌重孔懷  
之感刻密跂上公之品苴茅列異姓之王以慰營魂以  
華卹典於戲知足不辱知止不殆曾壽考之難期其生  
也榮其死也哀庶幽冥之不隔冀而英爽歆我情文可

湯漢以進書賞轉官回贈本生父嚴特贈奉直

大夫制

荀淑行高故八龍俱有偉望陳寔道廣故二方悉著賢  
名士生斯時豈能自為才賢也哉必其父菑子播極一

門積累之深是以昆令季強有再世顯融之美用彰潛德爰錫愍書爾以學識自通乎古人以義理自抗乎流俗在韋布有憂天下之志居陋巷如對上帝之臨實大聲鉉克開厥後疇昔有立朝典州而風節顯著拾遺補過而言行純明皆汝子也其季曰漢卓有特操似其先人典祕府貳容臺寢光顯矣一日自列願以史賞一秩與之回貲無忝所生亟賜之允以塞其念親報本之誠請尚慰汝課忠責孝之素懷可

母董氏特贈碩人制

婦人之行如玉在淵視其家庭以占內德非深仁懿識不能娠裔嗣之賢非孝子慈孫無以昭壺彝之美爾以恭儉信順相其夫則獨高山林隱德之風以慈和嚴翼訓其子則俱為海內知名之士漢之回貽出於誠請母氏聖善庶幾令德之傳碩人其碩尚服愍章之錫可

洪勲故父咨夔贈特進制

文昌之列八座既峻陟於禁塗特進之表羣公肆褒崇

於禰廟喜家羶之能復悲人鑑以如新具官某故父具  
官某高風輩慶歷之數公大節肩元祐之諸老解紱之  
日八元咸集於舜朝我冠而來百怪莫逃於禹鼎國有  
立政天不憖遺哲人其萎自關世道賢者有後式繼爾  
猷茲階庭踐維斗之華乃泉榘賁亞台之典噫人云亡  
邦殄瘁悵莫作於九原子能仕父教忠尚垂休於奕世  
可

母阮氏特贈吳郡夫人制



有子而賢既峻登於八座無母何恃乃弗逮於千鍾紓  
而風木之悲廣我露蕭之澤具官某故母具位某氏令  
儀懿行吉德純忱鴻案如賓真君子之配熊丸教子有  
古人之風茲升筆橐之華彌重栝棧之感昔榮保魯今  
賁臨吳雖不及夫人之肩輿必預識尚書之踐斗尚歆  
異渥以啓方來可

故妻張氏贈淑人制

命汝納言要必夫尊而妻貴與子偕老乃或生榮而死

哀質之邦彛是有贈典具官某故妻某氏爵以女士嬪  
于英儒青衫陋公卿猶勉以正象服宜君子不逮於存  
用錫美稱以華幽壤庶吾八座之老母重五噫之懷可  
端明殿學士通奉大夫致仕洪勲特贈光祿大  
夫制

山深林密既還弘景之冠道遠年徂俄易曾參之簣慨  
其歎矣睠焉顧之具官某學淵博以造微量宏深而經  
遠絲綸演潤端平故老之名家筆橐論思先帝侍臣之

偉望浸登要路勇退急流賢者考槃獨寐寤語嗣王訪  
落不我告猷甫徇垂車之榮忽上拖紳之奏死生亦大  
矣等於浮雲談笑而道之居然委蛻起九原而悼往從  
二品以崇終其人若存兮無遺壽考斯文未喪也尚有  
典型可

陳昉初除尚書母齊國夫人林氏贈魯國夫人  
制

八座升華班路已高於北斗千鍾弗泊庭闈空戀於南

陟其施露葉之流少慰風枝之恨具官某故母具位某氏柔嘉宅志嚴靜處躬生中興名德之家源流遠矣為先朝詞臣之配閨閭肅然每持熊膽以助勤弗逮魚軒之迎侍矧已躋榮於筆橐獨懷深感於栢棧噫有子而稱願然既識鄭尚書之履念母之不見也宜應魯夫人之文加而湯沐之封歆此泉塗之寵可

生母令人施氏贈淑人制

人代天工莫重納言之任母以子貴特榮淑德之封具

官某故所生母具位某氏隱約自持謙柔維則樂有子  
矣是生鳳穴之奇瞻望母兮蚤奉蘭陔之養茲躋榮於  
筆橐宜興感於栢棧芳塵遽掩於斑衣沈施特加於紫  
誥噫欲稱觴而為壽顧有風弗停之悲因曳履以疏恩  
庶酬天罔極之德可

故妻令人林氏贈淑人制

夫尊於朝已躋榮於八座婦歎於室其孰起於九原宜  
有特恩以昭愍錫具官某故妻具位某氏性專靜肅德

稟柔嘉家譜芬芳夙傳於祖閨儀嚴整善事其姑生而  
不恨於牛衣歿乃有加於象服噫為尚書婦亦少慰於  
蘋蘩曰君夫人必進承於禕翟芳魂不昧茂寵其歆可

欽定四庫全書

碧梧玩芳集卷九

宋 馬廷鸞 撰

制

陳壇除資政殿學士致仕制

朕餽惠先猷尊寵耆德昔孝宗淳熙之世有劉章胡銓  
其臣繇從班而陟殿帷初示優賢之禮自延康而拜資  
政用為告老之榮雖保身喜明哲之獨全亦謀國惜典  
刑之得謝其頒坦制以獎高風具官某受材恢宏制行

清謹嶧陽之桐泗濱之磬何風韻之獨高新甫之栢徠之松有歲寒而不變自簞搢紳之列徧儀藩從之華蚤著廉能今為宿齒平生冰蘖有一琴一鶴之風晚歲山林適某水某丘之趣比疏異渥以寵耆英欲遵漢世訪伏生之規亦念吳人稱尚父之語從以孫子固將下萬石之里門其在朝廷猶可授三老之几杖屢抗章而有請期納祿以自怡惟尊賢固人主之明而從欲亦聖人之恕峻升祕渥渙發恩綸家既有於安車門遂施於



行馬以昭體貌以款燕閒噫九秩而膳飲從遊式遵禮  
典百年而威儀自警尚聽詩箴諒惟存闕之忠無廢告  
猷之益有謀則就俾壽而臧可

劉克莊特授煥章閣學士致仕制

朕優禮舊儒愍煩官職請麾以出冀聞善養老而來拜  
疏不休迄欲致為臣而去喜爾得全於明哲悵予未厭  
於典刑式獎高風爰頒坦制具官某詞章遠輩於修軾  
學問上接於乾淳仰之彌高山斗一時之望行而必遠

江河萬古之流予解紱而更張爾覽輝而來下還居兩  
制其代王言擢長六官蓋先民譽進退有裕表裏無瑕  
擅名筆於本朝他學士閣不得下瞻者英於下國一靈  
光歸然獨存乃復抗章力祈謝事雅志深嘉於疏傳渙  
恩峻陟於堯章增西清荷橐之榮示東路角巾之寵鄉  
里蒙三老之教子孫下萬石之門噫巨源出京師之初  
供帳孰多於祖送居易辭同州之後掛冠未羨於保釐  
尚猷詢茲遐不謂矣可

翰林學士知制誥兼給事中兼修史年子才特  
授端明殿學士與宮觀制

朕惟哲宗元祐之初嘉范鎮老成之望陟延康之祕殿  
錫以恩華賦崇福之真祠遂其安逸用頒漢制併獎蜀  
珍具官某人有典刑學深源委頃從劔棧來瑞朝廷忠  
言嘉謨偉論豈殊于軾轍精筆妙墨英詞未遜於淵雲  
被遇先皇久登法從比纘鴻圖之始實傾黃髮之詢肆  
疇學士之真孰若禁林之老以疾來諗拜疏不休勞侍

從而厭承明具殫懇切專精神而輔醫藥宜聽優游超  
畀渙綸式稽故典入關而性多病已遂留侯之高風在  
畝而忠不忘毋替更生之直節可

牟子才特授資政殿學士致仕制

朝廷尚德方峻陟於延康君子遺榮忽聽違於神武欲  
全雅志乃進穹班具官某秀稟蜀珍蚤推國器噓海岱  
而出雲雨忠言若炳於丹青濯江漢而暴秋陽大節靡  
渝於華皓朕之初政朝有老臣甫傾蕭艾之周詢獨味

山林之長往何恙不已式遏其歸顧令自適於養恬忽復力祈於謝事念文獻之無幾慨典刑之有存用升規殿之榮名以侈耆儒之晚遇噫名彼故老嗟何及於咨詢賢哉大夫庶自全於止足勉而嘉遯服我寵章可

周坦特授中奉大夫守寶章閣直學士致仕制持江海之麾會且歸矣上星辰之履止或尼之方深側席之思遽覽懸車之奏具官某學全素履躬擅大名琅琅天人之奏篇蚤魁多士炳炳仁義之論諫獨冠七人

台斗之望浸高山林之日滋久比更大化念爾宿儒當  
令佩印綬以為邦不復隨弓旌而造闕俄上遺榮之請  
為頒增秩之恩噫進退豈不裕餘尚服孟軻之訓止足  
可以長久庶幾老氏之風茂對寵光益綏壽嘏可

中奉大夫方來特授太中大夫守寶章閣待制  
致仕制

朕瞻言耆舊候對嚴凝惟適之安方挹浮丘之袂何恙  
不已欲掛神武之冠特出明綬以華晚節具官某英姿

山立與學淵涵正色而言早登諫苑嘉謀則告繼上禁  
塗去佩郡章并流民譽雖仲舒厭事每不樂於京師而  
靈光獨存猶足鎮於下國遺榮荷橐亟請懸車可無褒  
升以嘉止足噫超遷賈誼嗟何及於少年即拜申公悵  
莫迎於故老可

謝堂特授華文閣待制提舉佑神觀免奉朝請  
制

十連為帥方預謀專閫之英三命益共竟莫遏循牆之

請魏閣特陞于候對珍臺仍領於內祠謙柄有光渙敷  
示寵具官某風猷明浚材術疏通生重侯累將之門豈  
軒冕之為貴得經生學士之趣有詩書以自娛察其理  
人御衆之長付以開府作牧之事南閩之寄甚重豈漫  
遷掄東山之志不渝疊形冲遜吾汗為反汝志良嘉得  
非高牙大纛之榮不易綵服斑衣之樂松階峻陟仰瞻  
虞帝之華蕊館自怡獨挹浮丘之袂併蠲朝請庸表寵  
嘉噫共理而無愁恨之民朕方課漢循吏之績遜職而



有慙慙之疏爾乃希晉賢戚之風益勉令猷嗣膺殊渥  
可

王堅致仕加恩制

門下朕念邊陲控帶之邦倚勲傑扞城之力老當益壯  
方圖將軍之功歸不待年忽致大夫之仕甫賴整師於  
淮浦詎期謝病於頻陽莫遏雅懷其敷異數具官某性  
根忠義資稟沈雄結髮而戰匈奴影纓而號飛將念昔  
銅梁之績重清玉壘之昏衝梯舞雲莫奪墨冢之守枯

泉飛液咸敬漢德之神西師歌心膽之寒北道裹餽糧  
而去徑登齋鉞來護周廬乃睠歷陽實維鉅鎮外峙邊  
頭之保障內增江面之藩籬宜宣老熊當道之威遽覽  
神虎掛冠之奏昔盱眙奮劒力全臧質之城今南郡賜  
金孰愈呂蒙之疾何恙不已鮮我方將儀辨三孤乃參  
華於亞傳爵冠五等仍進列於羣公併衍圭租俾安藥  
石於戲聽磬思封疆之烈靡忘著令以稱忠懸車傳子  
孫之榮猶可闔門而養重尚其冲嗇對此褒庸可

口宣

有勅卿有負薪之疾莫得而留職參位棘之班以華其  
老祇承恩寵茂介壽祺

勅

賜兩鎮勅

朕承太母之徽音遵先皇之治命時維叔父翕頌宗賢  
德言盛禮言恭謙光愈渥聖盡倫王盡制渙號宜加悵  
先志之未酬俾冲人而申錫仍洋川之舊組增夔國之

新麾時庸展親諭遠民而胥契不應後志聞成命以咸  
欣

賜呂文德銀合臘藥勅書

凝沍屆時嘉平紀節念上流之巨屏倚大將如長城嘗  
遣雪裘式昭眷注載頒臘劑往輔冲和軍懷挾纊之溫  
士有同袍之喜祇承朕命勤撫爾師

賜李庭芝銀合臘藥勅書

淮冰未合漢臘初臨睠予兩道連帥之臣獨任三邊風

寒之寄寶奩頒劑璽詔封泥助養冲和益優撫恤

賜汪立信銀合臘藥勅書

冬日烈烈三戌屆期江流滔滔十連倚重眷言副閫密  
接上游常懷陰雨之防益謹風寒之護式資寶璽爰錫  
珍良壯爾精神固予保障

賜劉雄飛銀合臘藥勅書

卿銳却北氛遠寬西顧三戌既屆乃漢家用臘之辰六  
甲重開又皇朝下蜀之歲茲頒寶劑往助珍調壯爾精

神拓予疆理

賜都統孫虎臣等銀合臘藥勅書

朕身居九重念關四塞霜露所墜皆予經理之區雨雪  
載塗感爾征戍之苦茲頒臘劑爰謹歲常益增衛生之  
經厚撫將屯之衆

賜諸閩銀合臘藥勅書

朔風凜冽江國嚴凝睠想大僚服勤專閩藥囊珍賚驗  
鴻寶之祕方璽檢細書飭嘉平之故事挾纊已孚於仁

氣看題用佐於生經

又

朔方氣勁當冰鬚雪脛之時南紀地雄有金城鐵壁之  
勢藉風寒之衛護先陰雨以綢繆眷我寶臣賜之珍劑  
用致熙和之助益宣杆禦之忠

又

雨雪三冬况鄰朔塞風寒兩道盡護全淮錫以璽書將  
之珍劑看題檢藥尚遵寶苑之方挾纘撫軍益壯金城

之衛

賜李庭芝銀合臘藥勅書

三冬戍臘兩道風寒眷吾從臣兼籌戍事輕裘制閩而  
髦頭之色寢清挾纈撫軍而龜手之方不試式資寧輔  
是有頒彝

賜江萬里銀合臘藥勅書

有懷二府之重臣分牧七閩之鉅鎮地雖煥若時屬寒  
凝其頒彝賜之珍良往助和倪之寶璫茂承主眷厚撫



民瘼

賜史宇之銀合臘藥勅書

卿以三槐之舊德鎮九曲之名邦斗柄北指而天下皆  
冬仁風南馳而閩地猶燠其頒上劑往助生經尚資肘  
後之良立起溝中之瘠

賜呂文德銀合臘藥勅書

朕念關漢塞之風寒恩重唐朝之臘賜眷吾勲傑正倚  
旬宣鎮國上流迫隆冬至其頒寶劑往助珍調壯靈旗

武帳之精神掃雪脛冰鬚之妖祲

賜汪立信銀合臘藥勅書

維大江西迫隆冬至眷言外閩服乃中權陰雨綢繆備  
殫勞勩風寒擁護誕錫珍良善撫民瘁厚固吾圉

賜安南國王陳威晃勅書

精裡陽館錫祉南鄉駿奔執籙雖侍祠之莫預象來致  
福實共祭之是資載考慶條誕敷惠術肆增封而衍食  
仍加號以表功祗服邦榮恪遵侯度

批答

文武百寮賈似道等上表奏請皇帝聽政不允

批答

朕初服斬衰躬承靈几晬顏永閔淚血長潛有父親有  
君尊天罔極而德欲報其創鉅其痛甚日雖久而愈自  
遲苟達此情何陳是牘匪惟成渙之難反抑亦彝典之  
有稽批諭已勤陳請未止雖張良雅志但願足於留侯  
然疏廣清風豈終辭於漢傳毋煩屢避宜即欽承所辭

宜不允不得更有陳請

賜文武百僚三上表請皇帝聖節名批答

朕觀唐世以暨本朝有王者興必建誕彌之節今冲子嗣嘗思繼序之難惟列聖之彝章煩羣公之固請敢因涼德而拂輿情執三年之喪方此遵行于達孝上千歲之壽詎容遽正于隆名當畢鉅憂徐議嘉禮故茲諭答宜體至懷

賜太傅右丞相兼樞密使魏國公賈似道上表

辭免以理宗皇帝祔廟已畢照典故轉官恩命  
不允批答

顧惟眇躬倚賴上宰靡瞻匪父白雲之馭寢遐所存者  
神清廟之靈方妥允資輔相克就儀文茲陟褒綸蓋遵  
彝典胡洊煩於撓疏致屢控於忱詞豈同寅協恭近輔  
且悉頒於成渥而鞠躬盡瘁上公乃獨闕於湛恩每覽  
遜章殊乖冲顧朕未有艾方將垂拱仰成公勿替刑何  
以他辭無受所辭宜不允

賜太傅右丞相兼樞密使魏國公賈似道三上  
表辭免以理宗皇帝祔廟推恩不允批答仍斷  
來章

比殫諭答仍斷來章祔廟推恩先王未之有改維垣正  
席庶民將具爾瞻義不當辭禮無庸過加勞賜而止一  
級固匪殊榮迪有祿而惟四人曷嘗專美高風足仰舊  
典難違正考父之益共于三未已范宣子之終遜其下  
若何申勸已勤奏陳宜止所辭宜不允仍斷來章

李庭芝乞歸田里不允批答

卿自膺推轂之求蚤奮折衝之略一節匪懈累年于茲  
王事不遑起居念南仲朔方之役我行固已永久懷吉  
甫太原之歸茲覽封章遂祈解組朕思皇祖烈救寧武  
功關南之任漢超山西之留郭進美成在久無競維人  
矧吾全淮今委儒帥滅烽卧鼓期永底於肅清緩帶輕  
裘尚益資於鎮撫祇若予訓無棄爾成所辭宜不允

